1614

DISCOVRS

fur les mariages de France & d'Espagne, contenant les raisons qui ont meu Moseigneur le Prince à en demander la surseance.

M. DC. XIV.

23 Mills

3 K

Acc \$3-101 (77)

DISCOVRS 32

SVR LES MARIAGES

de France & d'Espagne,
contenant les raisons qui
ont méu Monseigneur
le Prince à en demander la surseance.

"Est contre le droist diuin & naturel de marier ceux qui ne sont mariables par nature, qui sont au dessous de la puberté, & n'ont encor, selon la distinction du sexe, douze ou quatorze ans accoplis. Cela est expressemét prohibé & desfendu par les loix ciuiles de toutes les nations, & par les decrets des conciles & constitutions de l'Eglise. La raison de cette prohibition est manifeste, par ce que les impuberes n'ont point de consentement, qui est la forme qui donne l'estre & l'essence aux mariages, forme si necessaire que sans celails ne peuuet estre legitimes. Ce qui a lieu aussi bien és mariages des Rois, comme des particuliers, la loy estant egale & commune entr'eux pour ce regard; & n'est point besoing de l'esclarcir plus auant par raisons ou par authoritez, ny cofirmer par exemples, comme chose trop cogneuë.

Ce n'est pas pourtant que les peres ou meres, les tuteurs mesmes, ne puissent quel-quessois promettre par mariage leurs enfans ou leurs pupilles, auant qu'ils aient atteint la puberté, aage seul iuste & legitime pour con-tracter mariage. Cartelles promessessont tolerees, principalement entre Princes souue-rains, lesquels souuent promettent mariage pour leurs enfans impuberes, afin de s'entretenir en paix, par l'esperance d'vne future al-liance: mais c'est tousiours sous ceste necessaire condition, d'attendre leur libre-consentement, & suspendre l'execution de ces promesses, iusques à ce qu'ils aient atteint l'aage capable & suffisant de les approuuer ou desapprouuer. Ainsi nous lisons que l'Empereur Theodose I. siança de son viuant son fils Honorius aagé d'ynze ans seulement auec Marie fille de Stilico, auquel, lors de son deceds, qui fut l'an 398. il donna & la tutelle dudit Honorius & la Regence & administration de l'Empire d'Occident : toutesfois l'honnesteté publicque ne permit pas que le mariage s'acheuast, jusques à ce que Honorius eust quatorze ans accomplis, & qu'il fust entré en la quinziesme annee.

Par ce droict, qui tolere ces mariages, ou plustost promesses de mariage, la Royne, comme mere & comme tutrice (car à proprement parler la Regence n'est autre chose qu'vne tutele, pourquoy anciennement, comme nos histoires sont soy, les Regents

tuteurs & Regents du 33

prenoient qualité de tuteurs & Regents du Royaume) & le Roy d'Espagne, comme Roy &pere, ont contracté pour leurs enfans encor mineurs & impuberes, & promis mariage reciproquement entre le Roy & l'Infante: & le Prince d'Espagne & Madame Elizabeth, pour estre parfaict & accomplis, lors que le Roy & lesdicts Prince & Princesses auront atteint l'aage nubile & conuenable pour ce faire. Ce sont les propres termes du contract de mariage passé à Paris, au preiudice desquels & pour les eluder, ceux qui abusans de l'authorité publicque ont causé les desordres qui sont assés cogneus, veulent encor par yn exemple tres pernicieux & de dangereuse consequence, cotre l'ordre legitime de tout droit diuin & humain, marier le Roy en sa minorité par paroles de present, & ainst par mariage indissoluble, sans attendre la libre declaration de sa volonté, en son aage parfaict, libre & intelligent.

Il n'est point besoing d'examiner à present les raisons & consideratios publiques ou particulieres, qui ont meula Royne dés le commencement, à entendre à cette alliance, & la preserra celle de Sauoye, ni discourir sur la disserence des conseils qui estoient à prendre ou à reietter, si cest affaire, come il le meritoit bien, eust esté mis en deliberation. Car la Royne le sit seulement proposer, en presence de Monseigneur le Prince, comme vne chose resoluë & arrestee, non pour en deliberer, ou

demader aduis, mais seulement pour l'approuuer & consentir. Imitant en cela ces anciens Empereurs Romains, quoy qu'en chose bien dissemblable, lesquels pour faire descharger sur le Senat le mal-talét que le peuple auoit de leurs cruautez, proposoient ou y faisoiet proposer leurs aduis, & nul n'estoit si osé d'y contredire; ou ces Roys de Perse, au conseil desquels il n'estoit pas permis, aux affaires mesmes plus importans, de contredire à leur aduis. Ie diray seulement qu'il y a difference entre les promesses de mariage faites par les Princes souuerains, qui ont leurs enfans en leur puissance, par tout droit diuin & humain, tat comme Rois que come peres: & celles qui se font par des meres Regétes & autres Regéts, parce qu'ils n'ont pas les Rois mineurs en leur puissance, ny comme meres, ny comme Regents, estans eux-mesmes naturellement subjects à leurs souuerains, mesmes les meres à leurs enfans Rois, tant l'en faut qu'ils en puissent disposer par mariage.

Neantmoins on peut dire, comme apres la mort du Roy, pour plusieurs considerations d'Estat, l'ouverture de ces alliances, aux conditios portees par le susdir traicté, n'a pas esté inutile qu'aussi ça esté prudence, en ceste mauvaise & dure saison où estoit lors la France, de cedér au téps & ne s'opposer à ces promesses encor qu'il y eust assez de iustice & raison de le faire. Mais maintenant qu'on en veut presser & precipiter l'execution auant le temps, cela

ne se peult souffrir sans infidelité, sans s'appo? 37 ser à cette violèce, que ceux qui sont autheurs de ces mauuais conseils veulent faire à la libre volonté du Roy, lequel en cette action. moins qu'en toure autre, aucun de ses subiets, quel qu'il soit, ne peut obliger. Cela à meu Monseigneur le Prince & les autres Princes. Seigneurs & Officiers de la Couronne ioints auecluy, pour ne defaillir à ce qu'ils doiuent au Roy & à l'Estat, de s'opposer à cette resolution si precipitee & intempestiue, & demander la surseance de ces mariages, iusques. à ce qu'en l'assemblee des Estats generaux on ait sur ce pris les resolutions requises & necessaires pour le bien du Royaume, & conuenables à la grandeur & dignité du Roy, attendant qu'en son aage parfaict & legitime, estant arbitre de ses volontez, il puisse iuger de ce qui est vtile pour le bien de son Estat. Ce que Monseigneur le Prince declara ouuertement au sieur de Villeroy dés le mois de Decembre, lors qu'il luy fit entendre qu'on auoit refolu de faire la celebration & solemnité de ces mariages à la feste de la Chandeleur ensuiuant, & qu'il luy demanda s'il vouloit estre Commissaire du Prince d'Espagne pour espouser Madame, & que le Prince de Piedmont le seroit du Roy, pour espouser l'Infante, & stipuler les paroles de present, mostrans

La demande de cette surseance est iuste &

par là qu'ils ont intention de faire vn mariage

indisfoluble.

necessaire, & ne peut estre refusee sans iniustice. C'est la demade de toute la France, de tous les vrais François & fideles subiects du Roye Et ceux qui s'y opposent auec tant de passion, font assés cognoistre de quel esprit ils sont poussés, aimans mieux porter toutes choses aux extremes que dese departir de leurs projets & mauuals desseins; trop recogneus auiourd'huy pour en souffrir d'auantage les pernicieux effects, au deshoneur & à la honte de la France, à l'affoiblissement de ses alliés & à l'aduantage de l'Espagnol son ancien & capital ennemy, auquel ils seruent come esclaues, come ministres de son ambition demesuree,

ainsi qu'ils ont faict de tout temps.

Cela ne se peut plus dissimuler, la patience est vaincuë par l'apparence d'vn si grand mal, qui fait ouurir les yeux aux plus aueugles, esmouuoir les plus insensibles, voyans si hardiment entreprendre cotre la liberté du Roy, lequel on veut obliger en sa minorité, contre les loix de l'Eglise, contre la nature & condition du mariage, qui doibt estre accompagné de toute franchise & liberté, à vne alliance, dont l'heur ou le malheur ne passera pas seulement à sa vie, à sa personne, mais s'estendra à tout le Royaume: alliance qui concerne, non vne partie, mais l'Estat tout entier, & dont la reflexion estant au public, les incoueniens qui en peuuet arriuer seront beaucoup plus grands & plus dangereux. Car fil aduient que ce mariage, quoy que celebré

par paroles de present, ne plaise au Roy en l'aage qu'ilen pourra cognoistre le mal ou le bien, & qu'il se marie ailleurs, comme peut estre il trouuera qu'ille doibt faire; ceux qui ont tousiours leurs esperances de bastir de nos ruines la monarchie de l'Europe, & de nous ietter en quelque tourmente, pour faire profit de nostre naufrage, pourroient se seruir de ce presexte, pretendre cet autre mariage nul; rendre contentieux l'estat des enfans & leur droict à la Couronne, qui seroit vn grand mal qui passeroit à longues années en malediction surce Royaume, & nousietteroit en d'horribles confusions, qui se peuuent éuiter, en laissant au Roy la liberté au mariage, laquelle nul ne peult ofter a vn particulier, non pas mesmes le particulier à soymesme par aucune peine. Et si cette liberté est requise en aucun, encores plus à vn Roy pour luy, pour son Estar & pour la seureté de sapo-Sterité.

Mais il semble que ces malheureux proxenetes se veulent preualoir de la prochaine
tnaiorité du Roy à quatorze ans commencés,
pour tirer consequence de la capacité du
gounernement à la capacité de contracter
mariage. En quoy ils se monstrent ou ignorans ou malicieux. La loy de la maiorité,
faicte par le Roy Charles V. consirmée par
Charles V I. son successeur, qui est singulière en France, & sondée sur des raisons,
& considerations publiques asses cogueües, desere au Roy l'administration du

Royaume à l'aage de quatorze ans commences, auquel finit la tutele & Regence du Royaume, mais elle ne faict pas de preiudice à la loy de nature, qui requiert la puberté pour le mariage, & ne peut estre forcée par les loix ou dispositions des hommes. La raison de la diversité de ces deux loix est manife ste, & se peut recueillir de l'ordonnance mesmes de Charles V. C'est que pour gouuerner l'Estar, le defaut de ingement au Roys qui a seulement atteint l'aage de quatorze ans, est suppleé par le conseil des Princes & Officiers de la Couronne, dont la France est bien pourueue, maisau mariage, qui requiert auecla volonté la force du corps, personne ne peut suppléer ce defaut. On en peut dire encores vue autre raison: car le gouvernement de l'Estat n'est que l'administration des affaires presentes, qui de jour à autre suruiennent, & de la cognoissance du reuenu courant sans alienation ny du fonds ny de l'authorité ou droicts Royaux:là où le mariageaau contraire vnelongue suite pour l'aduenir, qui oblige le Roy toute sa vieau choix d'yne alliance, qui s'estendra à la posterité & de luy & de ses subjects, principalement quad elle se faict auec vn Prince voisin & puissant. qui ne la recherche que par consideration & par interest, pour en tirer aduantage auec le temps à nostre ruine. Ainsi Phi-lippe de Macedoine rechercha l'alliance d'Arysba Roy des Molosses pour le ruimer & le priver en fin de son Royaume.

Et Antiochus surnommé Epiphanes Roy de Syrie, par le moyen de l'alliane contractée auec le Roy d'Ægypte, se fust emparé du Royaume durant la minorité de son propre nepueu, si le Senat Romain ne l'en eust empesché & pris le Roy mineur en sa protection. Les exemples du passé nous donnent assés de suiet d'apprehender les ambitieux desseins de cet autre Philippe sur la France, & de mesmes causes attendre de melmes effects.

Ie ne sçay par quelle prudence d'estat on presse si inconsiderement, & auec tant de precipitation, l'execution de ce mariage, lequel quand mesmes il seroit faid: par paroles de present, n'emporteroit aucune legitime obligation, & quiparauenture ne s'accomplira point lors que le Roy sera en l'aage de le pouvoir aggréer ou de laggréer ainsi qu'il arriue de la plus part de tels mariages, qui se reuocquent le plus souuent, mesmes par ius gement de l'Eglise (qui ne les a iomais approuués. De quoy s'il estoit besoing ie pourrois fournir vn nombre infini d'exemples de goutes ses nations, ie mé contenteray d'en representer quelques vns tirés de nos histoires. Charles VIII. Roy de France l'an 1480. aiant esté accordé par Louis XI. son pere auantl'age de quatorze ans, par paroles de present, auec Marguerite d'Austriche fille de l'Empereur Maximilia, laquelle aagée seulement de deux ans fut nourrie en France l'espace de dix ans entiers, apres lesquels neantmoins ils furent separés par dispense du

Pape Innocent VIII. qui pour mesme raison, donna dispense à Madame Anne de Bretagne, & luy permit dese marier où bon luy sembleroit, encores qu'estant impubere elle custesté promise par François de Bretagne son pere, & le mariage celebré par procureur auec ledict Empereur Maximilian. Nicolas Duc de Lorraine, du viuant du Duc Jeanson pere, fiança par paroles de present l'an 1460. Madame Anne de France fille du Roy Louys XI. Neantmoins, estant depuis paruent en l'aage de quatorze ans, sans auoir égard à ce premier mariage, duquel il fut dispensé par le Pape Pie II. il espousa Madame Marie de Bourgogne fille de Charles dernier Duc de Bourgogne, laquelle il alloirespousers'iln'eust estépreuenu de la mort pendant les preparatifs de la solemnité des nopces. Et de nostre siecle, Madame Ieanne d'Albret, n'ayat que huict à neufans, fut promile en mariage au Duc de Cleues, par Henry d'Albret Roy de Nauarreson pere, & Madame Maguerite de France sœur du Roy Fráçois I. samere: mais auant qu'elle eust atteintl'aage nubile & legitime, encor que la solemnité de ce mariage eust estéaccomplie, elle en demanda la dissolution, laquelle luy fut accordée, & depuis elle espousa Antoine de Bourbon peredu feu Roy.

De dire que cette alliance n'est pas seulelement vtile, mais necessaire à l'estat present des affaires du Royaume plus qu'en autre saison, il saudroit de sortes raisons pour le persuader. Ce seroit saire tort à la puissance du

Roy & du Royaume, à la fidelité de ses bons serniteurs, de penser que l'Estat fust en cette necessité, que la Frace, qui tire apressoy tous les Estats de la Chrestiente, eust besoing de l'Espagne, pour se maintenir en paix & en repos. D'ailleurs qu'elle commodité, quel aduantage peut on proposer de cette nouuellealliance, quel fruict s'en peut on promettre en comparaison des maux prodigieux qu'on en doibt craindre? Il y a des serpens, des poison, des herbes veneneuses, vtiles à quelque chose, toutesfois d'autant que le mal y surpasse infiniement le bien, & que le peril des inconueniens qui en pourroient venir est mille fois plus grand que tout le profit quis'en pourroient tirer, on en prohibe au peuple l'vsage & le commerce. Si nous voulons considerer les grands progrés que l'Espagnol a faicts depuis les premieres ouuertures de cette alliance, tant parmy nous que parmi nosalliés, fauorisé des lasches & perfides conseils de ceux qui abusent auiourdhui auec vn orgueilinfuportable dugouuernement & de l'authorité souveraine du Roy, nous trouveros qu'elle est beaucoup plus preiudiciable qu'vtile à la Frace, & l'issue d'autat plus suspect, que nous voyons dés l'entrée entreprendre si hardiment sur nos frontieres de Nauarre, violer les limites du Royaume & y planter, sans cotredit, les marques d'vne nouuelle vsurpation. Cette alliance a faict trauerser le renouuellement de celle des Grisons auec les Venitiens, en faueur de l'Espagnol, qui a tousiours ses desseins sur leur liberté, au

B jij

desaduantage de la France, quin'a pas seule mentinterest d'auoir plusieurs amis & confederés, dont le nombre ne peut jamais estre grop grand, quelque puissant qu'on puissestre, maisaussi que ceux qui sont alliés auec clle soient bien vnis ensemble pour leur com-mune conseruation. Sans cette alliance les affaires d'Allemagne, en ce qui regarde principalement les Princes vnis, alliés de la France, neseroient à l'extremité, ou elle se voient aujourdhuy reduictes. Et le Roy d'Espagne n'eust aduancé ses desseins sur le Montferrat auec le progrés que le Duc de Mantoue est contraint de prendre la loy de luy, le soubmettre à ses volontés, & par vn mariage honteux auec sa belle sœur, conseruer son Estat dont il se voyoit autrement despouillé par les armes de ce puissant arbitre, qui par aduanture eust esté plus retenuà entreprendre sur les alliés & amis de ceste Couronne, s'iln'eust esté asseuré des bonnes volontés de ceux qui pour tant plus le fauoriser, & lui rendre vn iour l'entrée de ce Royaume plus façile du costé de la Sauoye ont donné les conseils de razer la citadele de Bourg, le plus fort & afseuré rempart qu'eust la France deça les Alpes, pour opposer à vne inuasion estrangere, par le moyen duquel la ville de Lyon estoit couverte, & par sa ruine demeure maintenăt frontiere, & exposée au hazard de la premiere surprise. Cela a grandement trauaillé la reputation de la France parmy ses bons voifins & alliées, mesmes ceux qui 15

font profession de la Religion pretenduereformée, qui ne pouuans attribuer ces resolutions à la foiblesse de l'Estat, qui a trop de vigueur & de puissance pour ne s'esmouvoir & relister à ces atteints, ne doubtent plus qu'il n'y ait vne secrete intelligence auecle Roy d'Espagne, au prejudice de leurs traictés, & parl'exemple du Montferat voyant qu'ils no pourroient estre assistés ny secourus de la France, si le Roy d'Espagne vouloit entreprendre sur eux, ils se sont vnis plus estroitementauecles autres Roys, Estats & Republicques dont l'interest est commun, pour se dessendre contre toute aggression & pour se garentir de la trop grande puissance d'Espagne, la quelle n'estant plus balancée par elle de France, au contraire appuiée & fortifiée par celle de France, liance, leur est grandement suspecte & redoutable. Les asseurances qu'on leur avoit données, par Ambassadeurs expres, que ces mariages n'auoient esté recherches pour leur nuire, qu'on auoit seulement pensé à allier les personnes non les affaires, donner vne fenime au Roy & vn mary à Madame, auoit en quelque façon leué les ombrages qu'ils en auoient pris dés le commencement: mais les effects contraires qui ont paru depuis, en diuerses actions publiques qui se sont presentées tant dedans que dehors le Royaume ioincts à cette grande precipitation qu'on apporte auiourd'huy à l'execution de ces mariages, redoublent leurs deshances, confirment leurs soupçons, quand mesmes ils voient la plus saine & plus entiere

partie de l'Estat s'y opposer, que se premier Prince du sang, & tant d'autres Princes & Sei-gneurs & principaux Officiers de la Couronne, les meilleurs & plus fideles seruiteurs du Roy les plus interessés à la conservation du Royaume & deses alliés, en demandet la surseance, pour les raisons cy dessus representées, ausquelles il n'est pas possible de contredire auec instice. Mais que diront-ils quad ils sçauront qu'en France on ferme l'oreille à vne si iuste demande? ils n'espereront pas qu'il s'y puisse plus trouver de soulagement ny de seureté pour eux puis qu'on repute à crime vne action si louable, pleine de fidelité & de iustice. & laquelle on ne pourroit obmettre ni s'é departir sans encourir vn blasme perpetuel tant de ceux qui vinent que de la posterité. Et que diroit vn iour le Roy de tant de Princes, Seigneurs & Officiers de la Couronne, entre les mains desquels sa liberté & son authorité est mise en depost & engarde, s'ils estoient spectateurs de cette violeces y opposer, si lasches & si stupides que de la souffrir & tat d'autres desordres qui menacent l'Estat de ruine dőt les plaintes ont esté representées à la Royne pour y faire pouruoir en l'assemblée des Estats generaux du Royaume desquels par artifice on essaye desia d'eluder la conuocation? Plaintes qui ne sont point imaginaires, ainsi qu'a voulu dire celuy qui a emprunté le nom de la Royne pour faire vne quatriesme Apologie de ses actions. La France & tous les François sçauent qu'il y en a encor plus

17

plus qu'on n'a dict, que le malest bien general & bien vniuersel, il s'est glissé dans les prouinces, dans les villes, dans les maisons & familles particulieres, dans l'Estat tout entier, dont il n'y a partie qui n'en ressente les miserables essects, il n'y a que la trop grande bonté de la Royne qui le luy faict ignorer pour auoir trop de consiance en ceux dont elle suit les conseils, ausquels elle donne vne authorité trop absoluc en l'administration des affaires publiques, dont ils abusent a son presudice, & ruinent par ce moien les principaux sondemens de l'Estat. C'est icy que i'addresseray mon discours a la Roine, & prendray la hardiesse de lui parler auec la liberté d'vn vrai & sidele subiect du Roy, qui aime sa partie & affectionne le service de sa Majesté.

MADAME, ons'est serui de diuersesartisices pour vous donner des desfiaces de Monseigneur le Prince & des autres Princes, Seigneurs, & Officiers de la Couronne qui sont ioincts auecluy. Toutes leurs actions quoy que plaines d'innocence, de fidelité & d'obeissance, propresa faire le bien, empescher le mal ont esté desguisées à V. M. & interpretees plustost selon la passion d'autruy, que selon la fincerité de leurs droictes intentions, on impute a crime tout ce qu'ils font, & sans entrer en cognoissance de cause, sans examiner la iustice de leurs remonstrances, on les public soubs vostre nom perturba-

teurs, du repos public : par ce qu'ils demant dent la surseance du mariage du Roy & de Madame iusques à l'aage requis par les loix diuines & humaines, & la necessaire reformation des des-ordres, qui menacent l'Estat d'une ruine ineuitable, s'il n'y est bien tost pourueu. Ce sont les crimes dont ils sont coulpables. Ainsi la franchise de donner de bons & salutaires conseils, est souuent perilleuse: mais l'homme de bien ne se lasse pourrant de conseiller tousiours ce qui est inste & vtile quoy qu'il ne soit aggreable. Beaucoup de choses semblent mal gratieuses à ouyr, dont toutes fois la declaration est necessaire. Il n'appartient qu'aux ames viles & serues de mentir & aux libres de dire vray. Les marques de cette servitude paroissoient visibles en quelques vns de ceux aux conseils desquels V. M. defere le plus lesquels demeutent souvent leurs pensées, n'osent dire ce, qui est veritable ou par flaterie luy disent le faux, luy representans les affaires en l'estat. que bon leur semble, & selon leurs passions particulieres, comme ces peintres qui ca-. chent les defauts des visages qu'ils ont à pour-traire au plus bas & profod des ombrages, les desrobans aux yeux des plus clairuoyans, & releuent & exposent a la veue de tous ce qui est de plus beau. Es choses importantes il est dangereux de la teste, ne prendre conseil, que de soy mesme ou le receuoir des autres, selon sa passion, chercher dans vn faux miroir l'image de la verité, don9 98 140

ner la main à vn aueugle, & par les precipices d'vn mauuais conseil le mettre en danger manifelte, & faites irreparables. V. M. me pardonnera, s'il luy plaist, si ie dy que sans y penser elle est tombée en cette extremité de donner tout à la passion, rien au conseil sinon de ceux qui rapportent toutes leurs intentionsà ce qu'ils sçauent luy estre aggréable, a ce qui peut contenter son desir, & qui ont alles d'audace, asses de ruse, & d'industrie pour ietter dans l'esprit de V. M. mille desfiances & craintes imaginaires, & pour conuertir sa bonté & douceur en vne rigueur & indignation extreme, luy persuader que ces Princes veulent roucher à l'authorité souueraine du Roy & la vostre, laquelle au contraire ils ont tousiours si fidelement maintenue & conseruée, comme ils sont obligés, n'ont rien laissé à faire ny àdire de ce qui a esté de leur debuoir, auquel ils ne manqueront iamais. Pour faire voir l'impudence de cette calomnie & imposture, recherchée à dessein par la malice de ces gens, dont les actions passées sont pleines de perfide, desloyauté & de trahisons, desquelles ils portent encor à leur honte les cicatrices & flestrissures sur le front, & qui ont tousiours abusé du malheur public au preiudice du bien & reposdel'Estat. Pardonnés moy, MADAME, si la iuste douleur me contraint de m'aigrir en cet endroit, pour repousser l'iniure qu'ils ont voulu faire sous vostre nom au premier Prince du sang, & à tant d'autres Princes,

Seigneurs, & Officiers de la Couronne, dignes d'vn plus fauorable & gratieux traitement. Cela est deu à la verité & à l'innocence qui leur est vne singuliere desense contre la violence de cet outrage. Leurs actions passées & presentes sont de si bonne odeur à tous les gens de bien, paroillent si visibles & si manifestes aux yeux de tout le mode, qu'elles n'ont besoing d'autre apologie, d'autre desense que d'elles mesmes, auec vn iuste desdain & mespris de la medisance de ceux qui craignent qu'on face voir au jour leurs deporremens, leurs intelligences dehors le Royaume, les resultats de leurs conseils secrets, qui apprehendent qu'on leur face rendre compte de leur conduite & administration, ses dessians de leur innocence, ne peuuent souffrir la legitime reformation des abus & desordres, qu'ils ontintroduits en l'Estat, prenoians bien qu'elle ne se peut saire qu'à leur honte. C'est la leur vicere, c'est leur playe, c'est ce qui leur faict douleur. Cette rhubarbe leur est fort amere à prendre, ils ne la peuuent gouster, elle les faict vomir, & par ce degoustement on peut voir ce qu'ils ont en l'ame, & iuger de la medecine par l'operation. C'est le naturel de tous meschans esprits de vouloir perpetrer audacieusement toutes meschancetés & ne vouloir qu'on s'en formalise. C'est ce qui leur faict donner à vostre Majesté, ces violents conseils de recourir aux armes, d'allumer, la guerre dans le Royaume, sur la miserable 21

esperance qu'ils ont de trouver quesque seureté dans les ruines de son embrasement, se sauuer sur quelque table de son naufrage. Et par ce qu'ils sçauent bien que d'eux mesmes ils ne peuuent pas ietter ce foudre, qu'ils n'ont point de puissance ny de Dieu ny des hommes de ce faire, ils en donnent les conseils à V.M. luy mettent le fer & le feu en la main, pour la porter à vne extremité dangereuse, plustost qu'à rechercher les moyens de l'euiter. Ce sont de pernicieux medecins qui veulent guairir vn corps vlceré par de nouueaux vlceres, ne considerans pas, ou ne voulans considerer, que bien souuent en la cure des grandes maladies on profite plus par le repos du malade que par le mounement & agitation que les remedes violens apportent: qu'és corps mal disposés vn petit apostume s'enfle & gaigne peu à peu bien auant, & en fin por te la gangrene incurable iusques au cœur. Considerés, MADAMB, l'importance & la consequence perilleuse de cette resolution, apprehendés le danger & la calamité qui en peuuentarriuer. Le pouuoir que vostre authorité vous donne est assez recogneu, sans qu'il soit besoing d'en faire vne espreuue si hazardeuse. Celuy-la sut ridicule qui prit de l'aconit pour faire essay desa vertu, laquelle il ne peust recognoistre que par la mort, qui oste toute cognoissance. Ne ressemblés à ceux qui trauaillés de faim deuorent la premiere viande qui se presente, sans regarder s'ils en peuuent mourir ou deuenir malades donnés vous le loisir, MADAME,

de penser auec vn esprit paisible & repose aux inconveniens qui peuventarriuer de la guerre, durant la minorité du Roy, & par la preuoiance des perils, recherchés les remedes & moyens de les éuiter. Ne troublés point le repos que la douceur de la paix a donné à la France, que le feu Roy luy a acquise auec tant de peine, & qui ne peut estre tant soit peualteré, qu'il n'apporte quand & quand vn grand & redoutable changement. Ayez enhaine & en horreur de si sanglans conseils; & par vostre prudence destournés les funestes presages qui s'en peuuent tirer. Ostés d'aupres de vous ceux qui en sont les autheurs, & vous induisent à ces rigueurs si contraires à la douceur & bonté de V.M. pour attirer sur vous la haine des desordres dont ils sont seuls la cause. Et quoy que l'innocence de V. M. en ce faich soit cognetie des plus sains & meilleurs iugemens, si est-ce que ceux qui sentiront le mal qui leur sera faict sous vostre nom, ne se predront qu'à vous mesmes qu'il croiront en estre la cause, & convertissans le respect qu'ils vous doibuent, & qu'ils vous rendent, en haine & en mespris, se porteront à toutes actions, quelques desesperées qu'elles puissent estre. Ne permettes, MABAME, que vostre reputation reçoiue cette flestrissure, que la posterité vous reproche, que vous aiés esté cause de la desolation d'vn si ssorissant Royaume, où vous aués receu tant d'honneur & de contentement, & que pour garantir quelques particuliers mal

affectionnés au public , vous en ayés aduancé la ruyne. Que si à l'appetit & suggestion de ces boute-feux V.M. continuë avouloir porter les choses aux extremes, si on allume le feu, ce sera iustement qu'on le reiettera sur ceux qui veulent embraser l'Estat, & lors la guerre seraiuste à ceux à qui elle est necessaire, puis qu'on leur oste tout autre moyé. Representez-vous, M A D A M E, qu'elle est la fureur de la necessité & du desespoir, quand il n'y a point d'autre falut que le danger. Vous pouuezarrester tout ce mal, & le preuenir par vostre prudence. La cause vous en estant cognuë il est bien aysé d'y applicquer le remede. Accordez doncq, MADAME, la surseance des mariages d'Espagne, & la conuocation des Estats generaux auec toute liberté & seureté, & faictes cesser l'armement qui met tout le monde en dessiance. C'est le seul moyen d'arrester le mal present, attendant que par l'aduis vniuersel de toute la France, on y puisse prendre vne bonne resolution & & pouruoir à tous les desordres du Royaume. Peut-estre serons nous si heureux, qu'oublians les aigreurs passees par vne salutaire reconciliation, & tous ensemble, d'vn cœur ouuert, d'vne volonté franche, d'vne affection ferme, & immuable, nous nous rencontreros en mesmes aduis. Et Dieu qui est autheur des bons conseils y fera esclorre des moyens que nous ne pensons pas, & tels que tous les gens de bien desirent & souhaittent & qu'ils sont necessaires pour le bien de l'Estat.

Noto Les tetre de cette lettre est après los jacque 16. 3,4 4. serge, a financial and an integral of But the second of the signal of the second of the Andrewski status († 1905) Amgina dan Shakara († 1905) and the state of the state of the state of Britis general for the second control of the second " Note to a series of the seri and the war with the contract of and the designation of the second The first of the second of the There is the state of the state and the second of the second of the second and while it has been a considerable of the contraction of the second the till was it is a sound of it, it is and the second of the second o - Stream in some with the comment of the Manager Control of the The Market of the Control of the Con r right of march from the contraction - Lysyld St. Take St. T.